

Jual nasi lemak tampung pengajian

» Ringankan beban ibu bapa, jana RM700 sebulan

Oleh Siti Sofia Md Nasir
siti.sofia@bh.com.my

► Serdang

Dengan tekad untuk meringankan beban ibu bapa dalam membiayai pengajiannya, seorang graduan sanggup menjadi penjaja nasi lemak sambil sepanjang menuntut di Univer-

siti Putra Malaysia (UPM), di sini. Fathi Ayyub Mohd Zaini, 23, meluangkan masa kira-kira dua jam sehari untuk menjaja nasi lemak di sekitar kolej kediaman universiti, bermula jam 6 petang hingga 8 malam.

Beliau berkata, kebiasaannya dia menjual 60 hingga 80 bungkus nasi lemak sehari yang diperolehi dari seorang peniaga luar dan mampu menjana pendapatan sehingga RM700 sebulan.


"Hasil jualan nasi lemak sedikit sebanyak dapat membantu meringankan beban ibu bapa untuk menampung pengajian sepanjang hampir empat tahun belajar.

Tak jejas pembelajaran

"Perniagaan ini tidak pernah menjejaskan pembelajaran saya. Bagi saya, hendak seribu daya, tak hendak seribu dalih," kata graduan Ijazah Sarjana Muda Sains Pertanian ini.

Fathi Ayyub adalah seorang daripada 7,149 graduan yang menerima ijazah pada majlis Konvokesyen UPM ke-37, di Dewan Besar Pusat Kebudayaan dan Kesenian Sultan Salahuddin Abdul Aziz Shah, di sini semalam.

Mengambil inspirasi daripada neneknya, Se'mah Ahmad, 80, yang juga seorang usahawan, Fathi Ayyub berkata, minat untuk mengemburi bidang keusahawanan



Fathi Ayyub (dua dari kiri) **meraikan kegembiraan** bersama keluarga pada majlis Konvokesyen UPM ke-37 di Serdang. [FOTO ROSELA ISMAIL/BH]

dengan menjual nasi lemak timbul selepas mendapati cafe yang ada di kampus kurang menarik dan tidak menyediakan banyak pilihan makanan kepada pelajar.

"Justeru, saya mengambil kesempatan dengan memulakan perniagaan nasi lemak dan menjualnya kepada rakan. Alhamdulillah ia mendapat sambutan menggalakkan," katanya.

“
Hasil jualan nasi lemak sedikit sebanyak dapat **membantu meringankan beban ibu bapa untuk menampung pengajian** sepanjang hampir empat tahun belajar”

Fathi Ayyub Mohd Zaini,
Graduan UPM